

Examinar seriusamain l'avertura dal martgà d'energia

L'Associaziun svizra per las regiuns muntagnardas (SAB) prenda posiziun tar l'avertura totala dal martgà d'energia

DA MARTIN CABALZAR

■ **L'Associaziun svizra per las regiuns da muntogna (SAB) renviescha il sboz dal cussegl federal per in'avertura totala dal martgà d'energia. La documentaziun aschuntada a la consultaziun na tanschia anc betg da giuditgar definitivamain davart las consequenzas economicas e davart l'efficienza dal model proponì per la promoziun d'energia regenerabla.** La SAB che represchenta ils interess da las regiuns muntagnardas è perquai da l'avis ch'i dovria perquai primamain in'analisi che dettia garanzia che las finamiras fixadas en la strategia d'energia 2025 vegnian era cuntanschidas tar in'avertura totala dal martgà.

Ristgs considerabels

«Sin fundament da la restructuraziun actuala sin il sector dal provediment d'energia en Svizra e considerond la vasta purschida d'energia sin il martgà europeic è la liberalisaziun totala dal martgà d'energia collià cun numerus ristgs», constatescha la presidenta da la SAB, cussegliera naziunala *Christine Buillard-Marbach*. Malsegirezzas datti cunzunt pertugant la segirezza da provediment e pertugant la posiziun da la forza idraulica e las ulteriuras energias regenerablas. Or da l'optica da las regiuns muntagnardas e dals territoris rurals sa tschenta era



Tenor il directur da la SAB, cusseglier naziunal Thomas Egger, sto la forza idraulica restar competitiva er en in martgà liberalisà.

MAD

la dumonda da las consequenzas concretas sin l'economia publica.

Or da l'optica da l'Associaziun svizra per las regiuns da muntogna munta l'introducziun previda d'in model da standard che sa basa sin la producziun d'energia regenerabla tar il provediment da basa e la realisaziun d'ina reserva d'arcunadi dad esser meglieraments essenzials en cumparegliaziun cun las emprimas propostas che prevedevan ina liberalisaziun totala dal martgà d'energia. Quests instruments possian tenor il directur da

la SAB, cusseglier naziunal *Thomas Egger*, contribuir a la finamira da mantegnair ils stimul necessari per investiziuns a lunga vista en capacitads indigenas sin il sector da la forza idraulica e quai era suenter che las mesiras transitoricas fixadas en la strategia d'energia 2020 èn spiradas.

Malgrà quests elements positivs na possia la SAB dentant betg entrar sin la revisiun, punctuescha Egger. La documentaziun sutmesssa per la procedura da consultaziun na tanschia anc betg per pudair examinar seriusamain la necessi-

tad da la refurma, la plivalur spetgada e las consequenzas negativas pussaivlas.

Dumondas essenzialas restan avertas

En ses rapport manchentia il cussegl federal da responder a damondas centralas. Cunzunt tschertga la SAB adumbatten indicaziuns precisas e fundadas davart il svilup dals pretschs d'energia per il martgà svizzer che vegn influenzà grondamain dal grond martgà europeic. Talas infurmaziuns sajan dentant da muntada centrala per pudair giuditgar l'efficienza dal model proponì per la promoziun da las energias regenerablas. Quai dependia sulettamain dal dumber da clients che restan anc en il provediment da basa regulà suenter in'avertura totala dal martgà. I saja extremamain dispitaivel sche la differenza dal client final resta sin mo sis pertschient, sco quai ch'il cussegl federal quinta. Ina gronda differenza tranter ils pretschs dal martgà global ed ils custs da producziun effectivs vegniss a reducir marcantamain l'attractivitat da la purschida en il provediment da basa. Tras quai na vegniss betg mo la realisaziun da la strategia d'energia 2020, mabain era la segirezza da producziun messa en dumonda.

Effect sin ils posts da lavur

Tenor la SAB mancan medemamain indicaziuns davart ils effects da la revisiun

sin la branscha d'energia e sin l'occupaziun. Bleras interpresas electricas localas e regionalas contribueschan oz cun lur posts da lavur ad ina colonisaziun decentrala da noss pajais. Ellas contribueschan uschia essenzialmain ad in svilup economic equilibrà da la Svizra rinforzond en il medem mument las regiuns flaiavas da structura. Sin fundament dal process cuntinuont da concentraziun e centralisaziun èn numerus posts da lavur periclitads. La SAB spetga perquai dal cussegl federal ch'el sviluppeschia strategias ch'han la finamira da cumpensar questas sperditas economicas en las regiuns muntagnardas ed en ils territoris rurals.

La realisaziun da la strategia d'energia 2050 ha prioritad

Il matg 2017 è ina gronda part da la populaziun svizra s'exprimida a favur da la nova lescha d'energia colliada cun la promoziun d'energias indigenas e regenerablas, inclusiv la forza idraulica. Tenor il directur da la SAB Thomas Egger ha la realisaziun da la strategia d'energia 2050 prioritad avant l'avertura totala dal martgà d'energia en Svizra. En in project sur-lavurà duai il cussegl federal orientar co el vul garantir ch'i dat era vinavant stimul sufficients per investir en la forza idraulica indigena en in martgà liberalisà.